

CYPE(5)-20-20 - Papur i'w nodi 24

Kirsty Williams AS/MS
Y Gweinidog Addysg
Minister for Education

Eich cyf/Your ref 200820-CYPE
Ein cyf/Our ref HED/KW/0026/20

Lynne Neagle AS
Cadeirydd
Y Pwyllgor Plant, Pobl Ifanc ac Addysg
Senedd Cymru



Llywodraeth Cymru
Welsh Government

7 Medi 2020

Annwyl Lynne,

Craffu ar y broses o ddyfarnu canlyniadau arholiadau 2020

Diolch am eich llythyr, dyddiedig 20 Awst, yn dilyn fy ymweliad â'r Pwyllgor ar y 18fed. Hyderaf y bydd yr ateb hwn yn rhoi'r eglurder rydych yn gofyn amdano.

Byddem yn gwerthfawrogi diweddariad brys gennych ar leoedd meddygol mewn prifysgolion, ynghyd â diweddariadau ynghylch unrhyw ddatblygiadau pwysig eraill mewn perthynas â'r materion a amlinellir uchod sy'n ymwneud â derbyniadau i brifysgolion.

Yn ddiweddar, sefydlais Grŵp Gorchwyl a Gorffen ar Dderbyniadau i Addysg Uwch, grŵp yr wyf innau'n ei gadeirio, er mwyn cael gwybod am unrhyw effaith ar sefydliadau addysg uwch a myfyrwyr yn sgil y canlyniadau Safon Uwch a chanlyniadau cymwysterau eraill yn ddiweddar.

Mae'r grŵp yn tynnu ynghyd gynrychiolwyr o Undeb Cenedlaethol y Myfyrwyr, undebau staff, Is-Gangellorion, UCAS, Prifysgolion Cymru, CCAUC, a swyddogion iechyd ac addysg y Llywodraeth.

Rydym wedi cyfarfod deirgwaith yn ystod y ddwy wythnos ddiwethaf, ac mae derbyniadau i ysgolion meddygol wedi bod yn eitem ar agenda pob un o'r cyfarfodydd. Gan weithio gyda'r Gweinidog Iechyd a Gwasanaethau Cymdeithasol, rydym wedi cytuno i gyllido 25 yn rhagor o lefydd ar gyfer israddedigion meddygol yng ngharfan 2020-21 Ysgol Feddygaeth Caerdydd. Mae 12 arall am ohirio eu hastudiaethau tan 2021-22.

O ran cwestiwn derbyniadau i brifysgolion yn ehangach, ar 3 Medi roedd sefydliadau addysg uwch Cymru wedi trefnu lle i 22,960 o ymgeiswyr, sydd 2% yn uwch nag yn 2019, ac roedd 18,520 o fyfyrwyr sy'n byw yng Nghymru wedi cael lle mewn sefydliadau addysg uwch yn y DU, sydd 1% yn uwch nag yn 2019.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Kirsty.Williams@llyw.cymru
Correspondence.Kirsty.Williams@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rydym wedi gweld nifer fwy o ymgeiswyr yn cael lle yn eu dewis cadarn, a llai yn cael eu gosod yn eu dewis yswiriant. Mae nifer lai o ymgeiswyr 18 oed sy'n byw yng Nghymru sydd heb gynnig pendant nawr nag oedd yna yr un adeg yn y cylch derbyniadau y llynedd.

Byddwn yn parhau i weithio gyda CCAUC, Prifysgolion Cymru, UCAS ac eraill i fonitro'r sefyllfa a'i heffaith ar y sector ac ar fyfyrwyr.

Byddem yn gwerthfawrogi diweddariad brys ar y trefniadau ar gyfer dyfarnu cymwysterau galwedigaethol ar draws yr holl gyrff dyfarnu sy'n cynnig nifer sylweddol o gymwysterau galwedigaethol yng Nghymru; syniad ynghylch pryd yr ydych yn disgwyl i'r canlyniadau BTEC gael eu cyhoeddi ar gyfer Lefel 1 a 2 a'u hailgyhoeddi ar gyfer Lefel 3; a syniad ynghylch a yw cyrff dyfarnu eraill yn bwriadu ail-raddio eu cymwysterau.

Ar 19 Awst, cyhoeddodd Pearson ei fod wedi penderfynu ailraddio canlyniadau BTEC er mwyn adlewyrchu Graddau Asesu Canolfannau yn llawn. Y rhesymeg oedd hyn: er bod canlyniadau cymwysterau BTEC yn weddol gyson â disgwyliadau athrawon a dysgwyr, roedd Pearson wedi dechrau pryderu ynghylch annhegwch posibl o ran canlyniadau galwedigaethol mewn perthynas â chanlyniadau uwch arholiadau TGAU a Safon Uwch.

Fel y gwyddoch, mae cymwysterau galwedigaethol Pearson yn cael eu dyfarnu ledled y DU. Maent ar gael i ddysgwyr yng Nghymru, ond Ofqual sy'n cymeradwyo trefniadau dylunio ac asesu'r cymwysterau hyn, gan adlewyrchu'r ffaith mai yn Lloegr y mae'r mwyafrif helaeth o'u dysgwyr.

Er bod Graddau Asesu Canolfannau wedi'u derbyn ar gyfer unedau mewnol (hy gwaith cwrs), cyfrifwyd y graddau ar gyfer yr unedau arholiad ar sail perfformiad hanesyddol er mwyn cynnal y canlyniadau cyffredinol dros gyfnod. Yn sgil adolygiad Pearson, gwnaed i ffwrdd â'r graddau hyn a gyfrifwyd, a chysonwyd graddau mewnol asesuadau athrawon a graddau arholiadau nad oedd modd i'r myfyrwyr eu sefyll.

Aeth Pearson ati i weithio gydag ysgolion a cholegau i ailgyhoeddi'r graddau hyn, ac ailraddiwyd pob cymhwyster erbyn 28 Awst fan bellaf. Roedd y broses ailraddio yn ymwneud â chymwysterau Lefel 1/2 a Lefel 2 yn ogystal â Lefel 3.

Mae cyrff dyfarnu eraill sy'n gweithredu yng Nghymru a ddefnyddiodd y model safoni ystadegol, yn hytrach nag addasu cymwysterau, hefyd wedi ailraddio eu cymwysterau galwedigaethol yn unol â'r dull a ddefnyddiwyd ar gyfer Safon Uwch. Mae hyn yn cynnwys CBAC, er enghraifft, ac AQA.

Rwy'n deall dymuniad cyrff dyfarnu i sicrhau canlyniadau teg i fyfyrwyr BTEC mewn perthynas â Safon Uwch a TGAU, fel na fydd unrhyw fyfyrwr BTEC dan anfantais. Mae hyn yn gydnaws â pholisi Llywodraeth Cymru i sicrhau na fydd dysgwyr sy'n astudio cymwysterau galwedigaethol dan anfantais o gymharu â'u cyfoedion sy'n astudio cyrsiau Safon Uwch, gan gynnwys mewn perthynas â symud ymlaen i addysg uwch. Unwaith eto, hoffwn ymddiheuro am y pryder a achoswyd gan yr hyn sydd wedi digwydd yn ddiweddar.

Yn ystod haf 2020, darparwyd canllawiau gennym hefyd i alluogi sefydliadau addysg bellach i ailagor, er mwyn i ddysgwyr galwedigaethol yr oedd angen iddynt gwblhau asesuadau er mwyn cael hawl i weithio allu gwneud hynny.

Yn amodol ar eich cyhoeddiad wythnos nesaf ynghylch adolygiad annibynnol, byddem yn croesawu diweddariad brys ar y camau y byddwch chi'n eu cymryd i ddarparu eglurder ynghylch unrhyw beth arall y byddwch yn ei wneud o ran dyfarnu cymwysterau yn 2020, a'r paratodau ar gyfer 2021.

Y prif gamau y mae'n dal i fod angen eu cymryd mewn perthynas â 2020 yw cyhoeddi dadansoddiad ychwanegol yr wyf wedi manylu arno yn nes ymlaen yn yr ymateb hwn, a datrys apeliadau.

O ran apeliadau a ddaeth i sylw CBAC, mae'r rheoleiddiwr Cymwysterau Cymru wrthi'n monitro'r broses hon yn ofalus i sicrhau yr ymdrinnir â nhw mor gyflym â phosibl. Caiff dadansoddiad pellach ei gyhoeddi hefyd mewn perthynas ag apeliadau a ddaeth i law ynghylch cyfres haf 2020.


O ran 2021, rwyf wedi ei gwneud yn glir fy mod o'r farn mai sefyll arholiadau fydd fwyaf buddiol i ddysgwyr haf nesaf, ond y dylid gwneud rhai addasiadau yng ngoleuni'r tarfu a fu ar y broses addysgu a dysgu, yn ogystal ag ystyriaethau cadw pellter cymdeithasol. Fe wnaeth Cymwysterau Cymru sefydlu fframwaith rheoleiddio eithriadol ym mis Gorffennaf sy'n caniatáu i CBAC wneud addasiadau i gymwysterau cyffredinol yn haf 2021.

Ar 1 Medi, cyhoeddodd CBAC yr addasiadau a gaiff eu gwneud i gymwysterau cyffredinol yn haf 2021, ar ôl ystyried ffactorau a oedd yn ymwneud â phynciau penodol ac ymgysylltu ag ymarferwyr. Rhoddwyd gwybod i ysgolion a cholegau am yr addasiadau hyn yn ystod yr haf i hwyluso eu gwaith cynllunio ar gyfer tymor yr hydref, ond maent bellach ar gael i'r cyhoedd eu gweld er mwyn rhoi tawelwch meddwl i ddysgwyr a'u teuluoedd. Rwyf wedi amgáu dolen at y dogfennau hyn ar eich cyfer: <https://www.cbac.co.uk/home/addasiadau-haf-2021/>

Gan ein bod yn dal i weithredu mewn amgylchedd ansicr o ran iechyd cyhoeddus, er ein bod yn cynllunio i fwrw ymlaen â'r arholiadau fel arfer yn 2021, fel Llywodraeth gyfrifol mae'n iawn ein bod hefyd yn datblygu trefniadau wrth gefn rhag ofn y daw tarfu pellach.

Rwyf wedi gofyn i Cymwysterau Cymru a CBAC, felly, ddatblygu trefniadau wrth gefn mewn perthynas ag arholiadau, gan dynnu ar ein profiad a'r hyn a ddysgwyd eleni. Bydd y gwersi a ddysgwyd a'r cynlluniau ar gyfer 2021 hefyd yn themâu allweddol yn yr adolygiad annibynnol a gyhoeddais ar 28 Awst. Bydd cadeirydd yr adolygiad, Louise Casella, yn cyflwyno ei ganfyddiadau cychwynol fis nesaf.

Yn gywir



Kirsty Williams AS/MS
Y Gweinidog Addysg
Minister for Education

ATODIAD – Gofynnir am wybodaeth bellach yng ngoleuni'r dystiolaeth a ddarparwyd gan CBAC, Cymwysterau Cymru a Llywodraeth Cymru ar 18 Awst 2020

Byddai'r Pwyllgor yn gwerthfawrogi'r wybodaeth a ganlyn:

- **Llinell amser o'r digwyddiadau sydd wedi dod i'r amlwg ers cyhoeddi'r penderfyniad i ganslo'r arholiadau, gan gynnwys:**
- **y cyfarfodydd a gynhaliwyd rhwng Llywodraeth Cymru a CBAC; rhwng Llywodraeth Cymru a Cymwysterau Cymru; a rhwng Llywodraeth Cymru, CBAC a Cymwysterau Cymru. Fel rhan o'r llinell amser hon, a fyddai modd nodi a oedd y cyfarfodydd hyn yn gyfarfodydd rhwng swyddogion yn unig, neu a oedd y Gweinidog yn bresennol?;**
- **y dyddiadau pan ddarparwyd y manylion ynghylch y canlyniadau Safon Uwch – a'r cyngor yn eu cylch – i'r Gweinidog Addysg;**
- **y dyddiadau pan fu cyfathrebu rhwng Llywodraeth Cymru (y Gweinidog a/neu swyddogion) a'r gweinyddiaethau datganoledig eraill mewn perthynas â'r broses o ddyfarnu canlyniadau ar gyfer yr arholiadau.**

Darperir yr wybodaeth y gofynnir amdani yn Atodiad A y llythyr hwn.

Sylwer: Rydym yn ddiolchgar i'r Gweinidog am ymrwymo yn ein cyfarfod ar 18 Awst i ddarparu llinell amser o'r cyfarfodydd a gynhaliodd hi'n bersonol gyda Cymwysterau Cymru yn ystod y cyfnod hwn.

- **Gwybodaeth bellach am Uned Nawdd Cymwysterau Cymru o fewn Llywodraeth Cymru, gan gynnwys:**
- **manyion ei chylch gwaith;**
- **manyion ei haelodaeth;**
- **cadarnhad ynghylch pryd y daeth yn ymwybodol bod y broses safoni wedi arwain at israddio 42 y cant o'r canlyniadau Safon Uwch, neu unrhyw amcangyfrifon cynharach;**
- **cadarnhad ynghylch a gafodd y wybodaeth hon ei throsglwyddo ac, os felly, i bwy a phryd.**

Tri swyddog Llywodraeth Cymru sydd i Uned Nawdd Cymwysterau Cymru, un ar lefel Gradd 7, un ar lefel BRh1 ac un ar lefel BRh3. Mae'r uned yn atebol i swyddog Gradd 6 sy'n goruchwylio gwaith y tîm ynghyd â chyfrifoldebau dau dîm arall. Mae'r swyddog Gradd 6 yn atebol i Ddirprwy Gyfarwyddwr y Cwricwlwm ac Asesu.

Cylch gwaith yr Uned Nawdd yw cyflawni'r swyddogaethau gweinyddol, monitro ac atebolrwydd i sicrhau rhyngwyneb effeithiol a phriodol rhwng Llywodraeth Cymru a Cymwysterau Cymru fel corff a noddir. Cyflawnir y swyddogaethau hyn yn unol â'r cyngor a ddarparwyd a'r gofynion a bennwyd ar gyfer cyrff a noddir yng Nghymru. Ymhlith y prif gyfrifoldebau mae rheoli ariannol, penodiadau cyhoeddus, cyhoeddi llythyr cylch gwaith, trefniadau atebolrwydd gan gynnwys mynd i gyfarfodydd Bwrdd a chynnal cyfarfodydd nawdd a rheoli rhyngwyneb effeithiol rhwng tîm polisi Llywodraeth Cymru a Cymwysterau Cymru er mwyn sicrhau cysondeb rhwng polisi a gweithredu.

Ar 28 Gorffennaf, cynhaliwyd cyfarfod Grŵp Rhannu Gwybodaeth rhwng Cymwysterau Cymru a swyddogion Llywodraeth Cymru er mwyn rhoi'r wybodaeth ddiweddaraf ar y broses ddyfarnu a rôl safoni. Cynhaliwyd cyfarfod pellach ar 3 Awst pan ddywedodd Cymwysterau Cymru wrth swyddogion y gallai graddau asesu canolfannau, yn dilyn proses

safoni – oherwydd anghysondeb rhwng canolfannau, ac er mwyn osgoi dyfarnu graddau rhy uchel – olygu bod:

- canran fach o ddysgwyr yn cael gradd uwch na gradd asesu eu canolfan;
- y rhan fwyaf o ddysgwyr yn cael yr un radd â gradd asesu eu canolfan;
- y gweddill yn cael gradd is na gradd asesu eu canolfan. Byddai canran fach o'r graddau a gyfrifir ddwy radd neu ragor yn is na gradd asesu'r ganolfan.

Cynhaliwyd cyfarfod pellach ddiwedd prynhawn 11 Awst rhwng swyddogion Llywodraeth Cymru a Cymwysterau Cymru. Trafodwyd trosolwg o'r canlyniadau, gan gynnwys nifer y graddau a oedd yn cael eu safoni'n is na graddau asesu canolfannau, a'r dadansoddiad manwl o ran cydraddoldeb. Cyflwynwyd yr wybodaeth hon i'r Gweinidog ac uwch-swyddogion Llywodraeth Cymru yn ystod nifer o gyfarfodydd a gynhaliwyd ar 12 Awst, fel rhan o'r cyfarfod briffio arferol a gynhelir ar sail embargo cyn cyhoeddi canlyniadau arholiadau.

- Ymrwymiad gan Lywodraeth Cymru i ddarparu diweddariadau rheolaidd i'r Pwyllgor ynghylch y camau a gaiff eu cymryd i roi'r adolygiad annibynnol ar waith, ac ymrwymiad i sicrhau bod diweddariadau ar gynnydd yr adolygiad yn dilyn hynny hefyd yn cael eu darparu inni.

Ar 28 Awst, cyhoeddais ddatganiad ysgrifenedig ar benodi Louise Casella, Cyfarwyddwr y Brifysgol Agored yng Nghymru, fel Cadeirydd. Bydd yr adolygiad yn ymchwilio i'r trefniadau a ddatblygwyd ac a sefydlwyd ar gyfer dyfarnu graddau yr haf hwn, a bydd yn tynnu gwersi o'r hyn sydd wedi digwydd eleni, yn benodol er mwyn llunio argymhellion ar gyfer sut i baratoi at 2021.

O ystyried y risg y gwelwn darfu pellach yn ystod blwyddyn ysgol 2020/21 yn sgil Covid-19, rwy'n teimlo ei bod yn hanfodol ein bod yn gweithredu'n gyflym a llunio canfyddiadau cynnar fel sail i'r gwaith o gynllunio a sefydlu trefniadau wrth gefn ar gyfer haf nesaf. Rwyf felly wedi gofyn i'r adolygiad ddarparu adroddiad interim imi ar y prif faterion erbyn diwedd Hydref. Bydd yr adroddiad terfynol a'r argymhellion yn dilyn erbyn canol Rhagfyr. Bydd yr adolygiad yn rhoi tawelwch meddwl i randdeiliaid, gan gynnwys dysgwyr, rhieni, gofalgwyr, athrawon a chyrrff addysg fod yna graffu wedi bod ar drefniadau eleni, a bod mesurau wedi'u sefydlu ar gyfer 2021. Byddwn yn croesawu barn a mewnbwn y Pwyllgor wrth i'r adolygiad fynd rhagddo, a byddaf yn gwneud yn siŵr eich bod chi'n cael gwybodaeth reolaidd.

- Asesiad o'r effaith y bydd y graddau safonedig arfaethedig a'r Graddau Asesu Canolfannau a ddyfarnwyd yn ei chael ar grwpiau penodol o ddisgyblion (disgyblion sy'n gymwys i gael prydau ysgol am ddim, disgyblion BAME, disgyblion ag anghenion dysgu ychwanegol, ac ati). Yn ogystal, asesiad o sut y mae'r gwahaniaeth rhwng y graddau safonedig arfaethedig a'r Graddau Asesu Canolfannau a ddyfarnwyd wedi effeithio ar ganolfannau unigol ac ar fathau penodol o ganolfannau.

Yn ddiweddar cyhoeddodd Cymwysterau Cymru ddatganiad ar ei gynlluniau i ddadansoddi ymhellach ganlyniadau'r haf hwn, ac rwyf wedi darparu dolen ato isod:

<https://qualificationswales.org/cymraeg/canlyniadau-haf-2020/datganiadau-cymwysterau-cymru/datganiad-ar-gynlluniau-ar-gyfer-datganiadau-ystadegol-pellach/>

Ar hyn o bryd, mae Cymwysterau Cymru wrthi'n gweithio tuag at gyhoeddi'r wybodaeth ddiweddaraf ar ei drosolwg o'r canlyniadau, a disgwylir i hon gael ei chyhoeddi yn ystod yr wythnos nesaf. Bydd hyn yn darparu amcangyfrifon mwy cywir o ganlyniadau terfynol yr haf hwn o ran Safon Uwch, UG, TGAU a Thystysgrif Her Sgiliau yn ogystal â chymharu â chanlyniadau blynyddoedd blaenorol a'r graddau safonedig a gynigiwyd. Bydd Cymwysterau Cymru hefyd yn diweddarau'r wybodaeth ynghylch bylchau cyrhaeddiad ac yn

ehangu arni gan roi dadansoddiad o ganlyniadau dysgwyr sydd â statws anghenion addysgol arbennig ynghyd â gwybodaeth bellach ar y canlyniadau yn ôl cefndir ethnig. Mae yna gynlluniau ychwanegol i lunio a chyhoeddi'r dadansoddiadau canlynol:

- Dadansoddiad o'r canlyniadau, graddau asesu canolfannau a'r graddau safonedig a gynigiwyd, yn ôl ardal ac awdurdod lleol
- Fersiwn fwy cyflawn o'r ystadegau ar [amrywiad ymhlith canolfannau](#) a gyhoeddwyd yn haf 2019, gan gynnwys gwybodaeth yn ôl math o ganolfan
- Dogfen sy'n tynnu ynghyd y gwaith dadansoddi o'r effaith o ran cydraddoldeb, â dadansoddiad manylach.

Canslo cyfres arholiadau haf 2020 – llinell amser

Dyddiad	Digwyddiad
4 Mawrth	Galwad gyda Michelle Donelan, y Gweinidog Gwladol dros Brifysgolion
6 Mawrth	Cyfarfod wythnosol ynghylch y trefniadau wrth gefn ar gyfer arholiadau - Cymwysterau Cymru a swyddogion o Uned Nawdd Llywodraeth Cymru
12 Mawrth	Cyfarfod pythefnosol rhwng swyddogion Addysg o Gymru, Lloegr, yr Alban a Gogledd Iwerddon
16 Mawrth	Cyfarfod â Cymwysterau Cymru i drafod Cymwys ar gyfer y Dyfodol
17 Mawrth	Galwad gyda Gavin Williamson, yr Ysgrifennydd Gwladol dros Addysg
18 Mawrth	Cyfarfod gyda CBAC a Cymwysterau Cymru i drafod yr opsiynau a'r trefniadau wrth gefn ar gyfer cyfres arholiadau haf 2020
	Cyngor ffurfiol ar ganslo arholiadau haf 2020 a'r opsiynau ar gyfer cyfrifo graddau.
	Datganiad yn canslo arholiadau haf 2020 ac yn cyhoeddi trefniadau amgen ar gyfer dyfarnu graddau.
	Galwad gyda Gavin Williamson, yr Ysgrifennydd Gwladol dros Addysg
19 Mawrth	Yn bresennol yng nghyfarfod y Pwyllgor Plant, Pobl Ifanc ac Addysg
20 Mawrth	Cyhoeddiad ar gyflwyno gwyliau'r Pasg yn gynharach a chau ysgolion ar gyfer y rhan fwyaf o ddysgwyr
	Cyngor ffurfiol ar beidio â defnyddio deilliannau o gyfres arholiadau'r haf i gyfrifo mesurau perfformiad, na'u cynnwys mewn pecynnau data na'u cyhoeddi ar Fy Ysgol Leol
24 Mawrth	Galwad rhwng Gweinidogion Addysg y pedair cenedl
24 Mawrth	Grŵp Gwybodaeth Gweinidogol Llywodraeth y DU
26 Mawrth	Cyfarfod gyda CBAC a Cymwysterau Cymru i drafod yr opsiynau ar gyfer dyfarnu graddau i ddysgwyr ym Mlynnyddoedd 10 a 12
	Cyngor ffurfiol ar y trefniadau ar gyfer dyfarnu graddau i ddysgwyr ym Mlynnyddoedd 10 a 12
	Llythyr i'r Ysgrifennydd Gwladol dros Addysg ynghylch cadw at y diwrnod canlyniadau arferol a pheidio â chyhoeddi canlyniadau'n gynharach
	Cyfarfod o Fwrdd Cymwysterau Cymru - swyddogion o Lywodraeth Cymru'n bresennol fel arsylwyr

27 Mawrth	Cyhoeddi'r dull gweithredu ar gyfer dysgwyr ym Mlynnyddoedd 10 a 12.
	Llythyr i sefydliadau addysg uwch ynghylch goblygiadau COVID-19
	Cyfarfod rheoli chwarterol - cyfarfod nawdd gyda Cymwysterau Cymru ac uwch-swyddogion
1 Ebrill	Grŵp Gwybodaeth Gweinidogol Llywodraeth y DU
2 Ebrill	Cyngor ffurfiol ar roi cyfarwyddyd i Gymwysterau Cymru ynghylch canslo arholiadau'r haf a chyfrifo graddau
3 Ebrill	Cymwysterau Cymru'n darparu canllawiau i ganolfannau arholi ar gyfrifo Graddau Asesu Canolfannau
	Cyfarfod pedair gwlad – rheoleiddwyr a swyddogion o Adrannau Addysg Cymru, yr Alban, Gogledd Iwerddon a Lloegr
6 Ebrill	Cyfarwyddyd yn cael ei roi'n ffurfiol i Gymwysterau Cymru ynghylch polisi Gweinidogion Cymru ar ganslo arholiadau haf 2020 a'r trefniadau ar gyfer dyfarnu graddau
7 Ebrill	Grŵp Gwybodaeth Gweinidogol Llywodraeth y DU
8 Ebrill	Galwad rhwng Gweinidogion Addysg y pedair cenedl
14 Ebrill	Cyfarfod gyda Cymwysterau Cymru i drafod y trefniadau ar gyfer cymwysterau galwedigaethol
16 Ebrill	Cyngor ffurfiol ar barhau i gynnal y diwrnodau canlyniadau a gynlluniwyd ymlaen llaw
	Datganiad ar ddyddiadau'r diwrnodau canlyniadau
	Grŵp Gwybodaeth Gweinidogol Llywodraeth y DU
17 Ebrill	Galwad gyda Michelle Donelan, y Gweinidog Gwladol dros Brifysgolion
22 Ebrill	Galwad rhwng Gweinidogion Addysg y pedair cenedl
24 Ebrill	Cyngor ffurfiol ar roi cyfarwyddyd i Gymwysterau Cymru ynghylch y trefniadau ar gyfer cymwysterau galwedigaethol
28 Ebrill	Cyhoeddi ymgynghoriad Cymwysterau Cymru ar y trefniadau ar gyfer cyfrifo graddau
28 Ebrill	Yn bresennol yng nghyfarfod y Pwyllgor Plant, Pobl Ifanc ac Addysg
30 Ebrill	Grŵp Gwybodaeth Gweinidogol Llywodraeth y DU
	Cyfarfod dwyochrog Cyfarwyddwr Addysg Llywodraeth Cymru a Phrif Weithredwr Cymwysterau Cymru
1 Mai	Grŵp Gwybodaeth Gweinidogol Llywodraeth y DU

5 Mai	Galwad gyda Richard Lochhead, Gweinidog yr Alban dros Addysg Bellach, Addysg Uwch a Gwyddoniaeth
6 Mai	Galwad rhwng Gweinidogion Addysg y pedair cenedl
7 Mai	Cyfarfod ynghylch cymwysterau galwedigaethol - Cymwysterau Cymru a swyddogion polisi
11 Mai	Galwad gyda Gavin Williamson, yr Ysgrifennydd Gwladol dros Addysg
13 Mai	Cyfarfod o Fwrdd Cymwysterau Cymru - swyddogion Llywodraeth Cymru'n bresennol fel arsylwyr
14 Mai	Cyfarfod o Fwrdd Cymwysterau Cymru - swyddogion Llywodraeth Cymru'n bresennol fel arsylwyr
19 Mai	Galwad rhwng Gweinidogion Addysg y pedair cenedl
28 Mai	Galwad rhwng Gweinidogion Addysg y pedair cenedl
29 Mai	Hysbysiad ymlaen llaw Cymwysterau Cymru am benderfyniad ynghylch y broses apelio yn dilyn yr ymgynghoriad
1 Mehefin	Galwad gyda Michelle Donelan, y Gweinidog Gwladol dros Brifysgolion
3 Mehefin	Galwad rhwng Gweinidogion Addysg y pedair cenedl
	Cyfarfod dwyochrog Cyfarwyddwr Addysg Llywodraeth Cymru a Phrif Weithredwr Cymwysterau Cymru
12 Mehefin	Cyngor ffurfiol ar ymgynghori ar lacio gofynion adrodd ysgolion
	Cyfarfod rhwng Cymwysterau Cymru a swyddogion Llywodraeth Cymru - cynllunio ar gyfer 2020-21
16 Mehefin	Cyfarfod eithriadol o Fwrdd Cymwysterau Cymru - swyddogion Llywodraeth Cymru'n bresennol fel arsylwyr
17 Mehefin	Galwad rhwng Gweinidogion Addysg y pedair gwlad
18 Mehefin	Cyngor ffurfiol ar rannu data asesiadau athrawon a data profion cenedlaethol Llywodraeth Cymru ar gyfer Cyfnod Allweddol 3 i gefnogi'r gwaith o ddatblygu modelau safoni
22 Mehefin	Cyfarfod gyda Cymwysterau Cymru ynghylch yr ystyriaethau cychwynnol ar gyfer arholiadau yn 2021
25 Mehefin	Cyfarfod rheoli chwarterol - cyfarfod noddi gyda Cymwysterau Cymru ac uwch-swyddogion
26 Mehefin	Cyngor ffurfiol ar barhau i atal mesurau perfformiad Cyfnod Allweddol 4 yn 2020/21, parhau i gasglu data ynghylch dyfarniadau TGAU a Safon Uwch a llunio cyhoeddiad Ystadegau Swyddogol ar lefel genedlaethol.
30 Mehefin	Galwad rhwng y tri Gweinidog Addysg datganoledig

	Cyfarfod eithriadol o Fwrdd Cymwysterau Cymru - swyddogion Llywodraeth Cymru'n bresennol fel arsylwyr
1 Gorffennaf	Galwad rhwng Gweinidogion Addysg y pedair cenedl
3 Gorffennaf	Llythyr i Gymwysterau Cymru ynghylch y dull gweithredu ar gyfer arholiadau yn 2021
	Datganiad yn cyhoeddi newidiadau i'r trefniadau ar gyfer cyhoeddi data ynghylch dyfarniadau cymwysterau oherwydd COVID-19
	Cyfarfod cynllunio ar gyfer canlyniadau a chyfathrebu rhwng Llywodraeth Cymru, CBAC a Cymwysterau Cymru – a gynhaliwyd yn wythnosol tan ddiwedd mis Awst
6 Gorffennaf	Cymwysterau Cymru a swyddogion Llywodraeth Cymru
7 Gorffennaf	Yn bresennol yng nghyfarfod y Pwyllgor Plant, Pobl Ifanc ac Addysg
	Cyfarfod eithriadol o Fwrdd Cymwysterau Cymru – rhoddwyd ymddiheuriadau ac nid oedd swyddog o Lywodraeth Cymru'n bresennol i arsylwi
9 Gorffennaf	Cymwysterau Cymru a swyddogion Llywodraeth Cymru - camau nesaf Cymwys ar gyfer y Dyfodol
	Cynllunio cydnerthedd Covid-19 - Grŵp Gorchwyl a Gorffen Safon Uwch - swyddogion o Lywodraeth Cymru, Cymwysterau Cymru a CBAC yn bresennol fel rhan o'r gynrychiolaeth ehangach allweddol.
10 Gorffennaf	Cyngor ffurfiol ar wneud Rheoliadau Llacio'r Gofynion Adrodd mewn Ysgolion (Cymru) (Coronafeirws) 2020
15 Gorffennaf	Dadl y Pwyllgor Plant, Pobl Ifanc ac Addysg - Effaith argyfwng Covid-19 ar blant a phobl ifanc yng Nghymru
16 Gorffennaf	Galwad rhwng Gweinidogion Addysg y pedair cenedl
	Galwad gyda Michelle Donelan, y Gweinidog Gwladol dros Brifysgolion
	Cyfarfod Bwrdd Cymwysterau Cymru - swyddogion Llywodraeth Cymru'n bresennol fel arsylwyr
17 Gorffennaf	Cyfarfod dwyochrog Cyfarwyddwr Addysg Llywodraeth Cymru a Prif Weithredwr Cymwysterau Cymru
21 Gorffennaf	Cyfarfod eithriadol o Fwrdd Cymwysterau Cymru - swyddogion Llywodraeth Cymru'n bresennol fel arsylwyr
22 Gorffennaf	Cynllunio cydnerthedd Covid-19 - Grŵp Gorchwyl a Gorffen Safon Uwch - swyddogion Llywodraeth Cymru, Cymwysterau Cymru a CBAC yn mynychu fel rhan o'r gynrychiolaeth ehangach allweddol.
28 Gorffennaf	Cymdeithas Llywodraeth Leol Cymru, Cyfarwyddwyr Addysg Awdurdodau Lleol, y Gweinidog Addysg, Cymwysterau Cymru a CBAC

	Grŵp Rhannu Gwybodaeth - cyfarfod rhwng Cymwysterau Cymru a swyddogion Llywodraeth Cymru i drafod paratoi ar gyfer y canlyniadau
3 Awst 2017	Grŵp Rhannu Gwybodaeth - is-grŵp paratoi ar gyfer canlyniadau - swyddogion Cymwysterau Cymru a Llywodraeth Cymru
7 Awst 2017	Rheoliadau Llacio Gofynion Trefniadau Adrodd mewn Ysgolion (Cymru) (Coronafeirws) 2020 wedi dod i rym
10 Awst 2017	Grŵp Rhannu Gwybodaeth - is-grŵp paratoi ar gyfer canlyniadau - swyddogion Cymwysterau Cymru a Llywodraeth Cymru
	Cyfarfod gyda Cymwysterau Cymru
11 Awst 2017	Cyfarfod gyda swyddogion ynghylch cyhoeddiad Llywodraeth yr Alban
	Galwad gyda Gavin Williamson, yr Ysgrifennydd Gwladol dros Addysg
	Grŵp Rhannu Gwybodaeth - is-grŵp paratoi ar gyfer canlyniadau - swyddogion Cymwysterau Cymru a Llywodraeth Cymru
12 Awst 2017	Cyfarfod gyda Cymwysterau Cymru
	Cyfarfod dilynol gyda Cymwysterau Cymru
	Cyfarfod briffio ymlaen llaw ar ganlyniadau gyda Cymwysterau Cymru
	Trafodaeth â swyddogion o'r Adran Addysg
	Cyngor ffurfiol ar sicrhau bod apelau a wneir i CBAC am ddim
	Galwad gyda Gavin Williamson, yr Ysgrifennydd Gwladol dros Addysg
14 Awst 2017	Cyfarfod am 10am gyda Cymwysterau Cymru
	Cyfarfod am 4pm gyda Cymwysterau Cymru
	Cyfarfod am 5pm gyda Cymwysterau Cymru
	Cyngor ffurfiol ar drefniadau diwygiedig ar gyfer Safon UG a Safon Uwch gan gynnwys cyflwyno'r rheol na fydd gradd Safon Uwch yn is na gradd AS, ac ehangu hawliau apelio
	Cyhoeddi adendwm i'r Cyfarwyddyd i Gymwysterau Cymru ynghylch Safon UG a Safon Uwch a phroses apelio ehangach
15 Awst 2017	Cyfarfod gyda Cymwysterau Cymru a CBAC

16 Awst 2017	Cyfarfod gyda Cymwysterau Cymru a CBAC
	Cyngor ffurfiol ynghylch yr opsiynau ar gyfer TGAU, ynghyd â goblygiadau defnyddio Graddau Asesu Canolfannau
17 Awst 2017	Datganiad ar y cyhoeddiad ynghylch dyfarnu graddau TGAU, Safon UG, Safon Uwch a'r Dystysgrif Her Sgiliau ar sail Graddau Asesu Canolfannau
18 Awst 2017	Cyhoeddi Cyfarwyddyd diwygiedig i Gymwysterau Cymru ynghylch dyfarnu graddau ar sail Graddau Asesu Canolfannau
19 Awst 2017	Cyfarfod gyda Cymwysterau Cymru - briffio ymlaen llaw ar ganlyniadau TGAU

Sylwer – mae'r cyfarfodydd a amlygwyd mewn glas yn gyfarfodydd a fynychwyd gan swyddogion yn unig. Ceir dau gyfarfod a gynhaliwyd yn wythnosol a dim ond y cyfarfod cyntaf sydd wedi'i nodi yn y tabl er mwyn bod yn gryno, sef y cyfarfod wythnosol ar y trefniadau wrth gefn ar gyfer arholiadau - cynhaliwyd y cyfarfod cyntaf ar 6 Mawrth, a'r cyfarfod wythnosol ar gynllunio ar gyfer canlyniadau a chyfathrebu - cynhaliwyd y cyfarfod cyntaf ar 3 Gorffennaf. Cafwyd hefyd dau gyfarfod a gynhelir bob pythefnos ac eto dim ond y cyfarfod cyntaf sydd wedi'i nodi yn y tabl er mwyn bod yn gryno. Y cyfarfodydd hyn yw'r cyfarfod pythefnosol rhwng swyddogion o Adrannau Addysg Cymru, Gogledd Iwerddon, yr Alban a Lloegr- cynhaliwyd y cyfarfod cyntaf ar 12 Mawrth, a chyfarfodydd y pedair gwlad rhwng rheoleiddwyr a swyddogion yr Adrannau Addysg – cynhaliwyd y cyfarfod cyntaf ar 3 Ebrill.